

MH370 jejaskan jumlah pelancong dari China
MalaysiaKini.com
Mar 24, 2014

Menteri Pelancongan dan Kebudayaan Datuk Seri Nazri Aziz mengakui insiden kehilangan pesawat MH370 "sedikit sebanyak" menjejaskan kedatangan pelancongan asing khususnya daripada China ke negara ini sempena Tahun Melawat Malaysia tahun ini.

Bercakap sewaktu menjawab ke atas perbincangan titah diraja bagi kementeriannya, Nazri (BN-Padang Rengas) bagaimanapun tidak memberikan sebarang statistik mengenai perkara itu.

Sehubungan itu, Nazri berkata selagi misteri pesawat hilang itu masih belum terjawab, pihak kementerian tidak bercadang mengadakan siri jelajah mempromosi program itu ke China demi menjaga sensitiviti keluarga penumpang yang terlibat.

"Pada waktu ini, bagi Kementerian buat seketika ini sehinggalah kita akan mendapat mengetahui tentang di mana MH370 ini, sehingga itu, saya mengambil keputusan tidak mengadakan apa-apa program jelajah terutama di negara China memandangkan perkara ini amat sensitif.

"Selagi MH370 kita tidak dapat tahu apakah akhir ceritanya, maka selagi itu sukar kita mengadakan rancangan untuk menarik pelancong dari sana.

"Kita perlu hormat. Kalau kita ada program jelajah, (bermakna) kita tidak ada perasaan sensitif keluarga penumpang yang ada di situ.

"Jadi setakat ini, kita tidak ada rancangan untuk memperhebatkan usaha untuk menarik pelancong khususnya negara China," katanya.

Beliau menjawab pertanyaan Fong Kui Lun (DAP-Bukit Bintang) berhubung langkah kerajaan memastikan sasaran 28 juta pelancong mencapai matlamat apatah lagi insiden MH370 dianggapnya boleh menjejaskan matlamat program itu.